

CORINTO KA WATWAT PEAPTUP PAULO EMUDUPMUBARARAKTUP XEPXEPATUP

¹ Corinto ka watwat, cartadup mubarararağ òn eywe-beaptum—Deus ebekitkiyũ adeayũ beaptum, Grécia eipi watwat beaptum. Òn Paulo. Jesus Cristo emumuju òn Deus bikuyap tağ. Tupmubarararağ òn wuykitpit Timóteo eju—wuyxe ikukpinat eju.

²— Bay, xipan cuy Corinto ka watwat ejukuk — i òn e'em Deus pe—wuyebay be, Jesus Cristo be dak—wuykukukat pe. — Ixeyũ ağuy mubabibin cuy eğuy — i òn e'em cebe ip.

³— Soat podi ma ên xipat — i juy acece Deus pe. Ixe ma wuykukukat Jesus Cristo eбай. Ixe ma wuyebayat tak. Soat em xipan wuykuğ. Soat em wuybuywatwan. ⁴ Xipat'ũmat jebapukpuğ ocewebe bima, ixē ma oxebuywatwan. Imēnpuye warara'acayũ be xipat'ũmat ebapuk puje, ocetaybit ibuywat am ip, ipiatpi'ajojom ip pima dak. Ocetaybit ixeyũ buywat am, Deus soat em kuy oxebuywatwan puye. ⁵ Apēn Cristo juk adi ipiat o'supi'ajojo iap puxim oceju dak ipiatpi'ajojom ocetabut Cristo kay buye. Imēnpit biğ ma oceju ipiatpi'ajojom pima, biğ ma ixē dak oxebuywatwan oca'òmucanucan.

⁶⁻⁷— Deus oxebuywatwan e'em — i juk adi oce eywebe kuy bima. — Deus ocedaxijojom ipiat'ajojoap kay ocejuap puxim — i dak cuk adi oce eywebe. Imēnpuye Deus kay'ũmayũ oce kay kay jĵă. Ipiatpi'ajojoan ip ocewebe. Wuyju ipiatpi'ajojom pima bit, Deus wuybuywatwan cĳcā. Kuy eyetaybit iboam. Imēnpuye:

— Wuyju dak ipiatpi'ajojom pima, Deus wuybuywatwan jeenuy — i juy epe'e'e eyewewebe a'òmucan am. —

Wuykay'ũmayũ wuykaykay bima dak, ixe wuybuywatwan ma jeenuy — i juy epe'e'e eyewewebe.

Ixe ma eya'omucanucan jeenuy eywebe eyetabucap epereap puxim.

⁸ Okitpitpiyũ, ade jĩjã xipat'ũmat o'jebapukpuk ocewebe Ásia eipi be bima. Iboap cuy oġuwẽn eywebe eyetaybit'ũmap puxim. Ipiat ocesupi'ajo jĩjã. Ipxoi jĩjãat kuġ oceweju iap co'i ma juk adi ocekekuku. Tũybe aceap iãn cuk adi oce'e. ⁹ Tũybe warara'acat wuyaoka iãn cuk adi oce'e. Imẽnpuye juk adi ocetaybit ocesop iba'ore ocewebe jewedaxijoam iam, Deus pe acã iba'ore ġu ocedaxijoam iam tak. Ixe be acã imutait put ce'ũat tak.

¹⁰ Ixe juk adi ocedaxijojo warara'acat pe ocaokaap puxim. Ixe ma ocedaxijom jeenuy soat em. Ocedaxijom jeenuy xipat'ũmat ebapukpuġ ma'ġu ocewebe. Imẽnpuye ocetabut cĩcã cekay. ¹¹ Eyju dak cuy ocebuywatwan epesop kawẽnwẽn pima Deus eju ocewebeam. Deus tak ocebuywatwan jeenuy, ocewebeam eyju kawẽnwẽn puye. Xipat cĩcãat je'ġũm ocewebe. Xipan jeenuy ocekuġ. Imẽnpuye adeayũ je'e cebe:

— Bay, soat podi ma ěn xipat, xipan Pauloyũ ejukuk puye — i. — ěn xipat cĩcãat ũmũm cebe — i dak je'e ip cebe.

¹² Abu buk oceġuġuykuku? Ka'ũma ma. Cedaġ ma juk adi ocekekuku. Xipan ma juk adi ocesop warara'acat kuġ. Eykuġ pit ibodi ma ocesop xipan eykuġ. Icẽmãn oceju iboam e'em. Apẽn cedaġ ocexe iap taġ oceju jekukum, ocetaybit cĩcã buye ġu—Deus ocebuywatwan puye acã; ixe soat em xipat cĩcãat ũmũm ocewebe buye dak. Imẽnpuye ocecokcok ocekuuap kay cedaġ ma oceku buye. ¹³ Kawẽn iba'arẽmatup mubararaġ ġu õn eywebe—kawẽn ibapukatup acã. Obu'u ma juk adi oġuy eymuġuykuku cartadup pe. Eyetaybitbũt ã õn. Imẽnpuye

juy omuymuy ġu bit epesop! ¹⁴ Ğuyjom pit aco'i eyetaybit cícã epe'e òn. Eycokcoğ epesop okay ġebuġe bit. Òn tak ocokcoğ oce eykay waram wuykukukat Jesus ajẽmap kabia be.

¹⁵⁻¹⁶ Koap pima bit cuk adi a'ġu wa'õ kay jĩjã epesop. Imẽnpuye eyjo pin cuk adi oğuy Macedõnia eipi kay cum pima, ibocewi jepin pima dak. Imẽn eyjoġo buġe kuka juk xepxep em oğuy eymucokcoğ Deus ekawẽn eymutaybit-bin. Eyju dak kuka juk obuywan epe'e Judéia eipi kay oju am. ¹⁷ Wetaybit'ũm tu oğuy eyxe eykay iju pin pima?

— Ewekay acã ěn ěbum — i du eyju e'em owebe? — “Cum òn eykay,” i ěn e'em ocewebe cum'ũm pima — i du eyju e'em owebe?

Imẽn ġu òn e'em! ¹⁸ Deus pit napa ġu e'em. Soat em ja'õ dağ e'em. Òn tak inapa bit oce ġu. Deus itaybit iboam.

— Hm hm. Cum òn eykay — i'ũmġu òn e'em, cum'ũm pima bit.

¹⁹ Òn ma Jesus Cristo juk adi oğuwẽnũwẽn eywebe. Timóteo dak cuk adi ixẽ ma o'ğuwẽnũwẽn eywebe, Silas dak. Ixẽ Jesus Cristo Deus ipocat.

— Em òn — i'ũmġu ixẽ e'em em'ũm pima.

Ja'õ dağ pit soat em ma e'em.

²⁰ — Xipacat oğũm eywebe — i'e'em Deus wuywebe.

Ibo bubum ma wuyju xipacat pupum, Jesus Cristo Deus a'õ dağ iũmũm wuywebe buye. Imẽnpuye:

— Imẽn cuy je'e, soat em Deus ja'õ dağ e'em puye — i wuyju e'em soat pe. Imẽnpuye:

— Warara'acat podi ma Deus idip — i'e'em adeayũ dak.

²¹ Deus ma ja'õbacaap iũmũm wuywebe Cristo ekukuap puxim wuyeku am. Ixẽ ma juk wuynaẽ jebekitkin.

²² Wuybutet mubarararağ wuybubut pe teku juy obubut iap mubapuk am soat pe. Imẽnpuxim Deus tak jebiõğbuk o'ğũm wuywebe teyũku webekitkit iap mubapuk am soat

pe. Ixe biõğbuk wuywebe bima, wuyetaybit soat wuywebe iũm piniat acejat iam.

²³ Deus itaybit icẽmãn õn e'em eywebe iam. Eykay oju buje bit, kuka mo õn eymukorẽm. Imẽnpuye oju ġu eykay eymukorẽmap puxim. Obu'u eymuğuycũğ. ²⁴ Jeymukũyjo ġu bit oceju eyetabut am, kuy eyetabut cĩcã buye. Imẽnpit eycokcok cĩcã ġu buk—eycokcoksũ ma. Imẽnpuye ocexe eymucokcok pin.

2

¹ Imẽnpuye:

— Odaobu'u'u Corinto ka beayũ kay imukorẽmap puxim ip—imuğuycũğap puxim tak ip — i juk oce owebe ma.

O mucokcokcoğ cuk adi epesop kuy bima. ² Owebe eymuğuycũğ puje bit, abu kuka omucokcoğ? Ka'ũma ma! Soat kuka eyğuycũğ epesop. Imẽnpuye oju ġu eykay obu'u eymukorẽm puye. ³ Imẽnpuye koapatup cuk otupmubararak cartadup eymukorẽmaptup. Ikẽrẽat muğẽğẽap cuy epeyepere oajẽm awap. Eywebe omuğuycũğap kay ġu juy õn oajẽm puje. Eywebe omucokcoğap kay acã juy õn. Õn ocokcok pima, eyju dak eycokcok ma epesop. ⁴ Oğuycũğ cĩcã eykay bima ibodup cuk otupmubararak eywebeaptup—wağuybabi'ũm eykuğ pima. Wetadidetoğ ma juk adi otupmubararak. Eymuğuycũğap ojuy ġu bit cuk otupmubararak—eymukũyjoap ojuy acã. Eymukũyjo pin cuk adi oğuy eykukpin cĩcã oxo iam.

⁵ Iğo bit cuk adi omuğuycũğ cĩcã ağokatkat, eyxeat, ikẽrẽat muğẽğẽ'ukat. Iğo juy epeğukorẽm iaptup cuk adi otupmubararak eywebeaptup koapatup. Omuğuycũğap podi ma bit iğo juk adi eymuğuycũğcũğ osunuy pũğpũğpũğ ey'in. Eya'o'puruğ ġu bit cuy epeğukorẽm—eya'õdidim ma. ⁶ Ade ey'in cuk kuy

iġo o'ġukorēm̄rēm̄ waram ġuto cedaġ ma ceku am. Kuy juy o'e. Waram pit epeġukorēm̄ ġu. ⁷ Ġebum ġu juy epesop ġasū bit apēn ixē ikērēat o'ġuġē iap kay. Epesubuywan ġasū bit. Iburem cuy epesop biġ ma iġuycūġap puxim—Deus ikērēat ju'uk ġu owebewi i'eap puxim. ⁸ Xipan cuy ixē epejukuk ġasū bit imutaybin am ocexe ekukpin cīcā iam. ⁹ Kūyjobit paxi adi ip wa'ō kay iam cuk adi oġuy wetaybin pin. Imēnpuye juk ibodup otupmubararak eywebeaptup koapatup. ¹⁰ Iġo aġokatkat cuk adi omuġuycūġ ikērēat muġēġē'ukat. Imēnpit eyju ġebum'ūm pima apēn ikērēat o'ġuġē iap kay, ōn tak ġebum ġu oce iboap kay. Waġuyba'ūm iboap kay Cristo etabutpe. Waġuyba'ūm puje, xipat ma je'e eywebeam tak. ¹¹ Ġebum ġu oce iboap kay Satanás pe wuyaġuyba'arēmap puxim. Wuyetaybit apēn Satanás jewaġuymuġēġēm̄. Ibikuy jījā wuywebe ikērēat muġēġēan.

¹² Kuy ma juk oju Trōade ka be kawēn idipat muwēn ām iboka watwat pe—Cristo muwēn ām cebe ip. Iba'ore jījā osunuy iju am. Emukacūġap puxim wuykukukat pit omuju kawēn idipat muwēn ām cebe ip. ¹³ Waġuybabi'ūm cīcā juk a'ġu oġuy, wuykitpit Tito dobuxik'ūm puye. Imēnpuye ocewemuwēn ibo ka watwat pe. Macedōnia eipi kay juk oju ikudadam.

¹⁴ Kuyje ya'ōcaat oexe nopaġōġōap taġwi taomūn-mūn'ibiyū kuġ. Soat etabutpe oexe—jebekitkit etabutpe. Imēnpuxim Deus tak soat em wuya'ōmucanucan Cristo eju mūġ'i wuyeku am soat etabutpe jebekitkit etabutpe. Apēn soat taġ te'okuat jepōġpōġpōġ iap puxim Deus tak wuytujum soat kaka daġ. Wuymujum Cristo ekawēn muwēn ām soat ka watwat itaybit am ixem. Imēneju:

— Warara'acat podi ma ēn xipat! — i juy ace cebe—Deus pe.

¹⁵ Kuyje paĩyũ te'okuatõm mupikupik'uk osodop ip tiğmuju am Deus kay. Wuyekukuap te'okuatiğ puxim, wuyju Cristo bikuyap tağ jekukum puye. Cristo ijoptiğ tiğmuyuhum Deus kay. Te'okuatiğ jediğepõğpõğpõğ Deus taxijom'iaiyũ be te'oyõn ãm, ipiat'ajojoap kay cumayũ be dak te'oyõn ãm. ¹⁶ Ipiat'ajojoap kay cumayũ xe wuyju Cristo bikuyap tağ jekukum iap te'okõõmat puxim e'em—wuye'ũ'ẽmate'o buxim. Deus taxijom'iaiyũ xe bit te'okuat puxim e'em wuyekukuap—wuymu'ada'adaapte'o buxim. Abu-be Cristo imuwẽn put wara'at ka watwat pe? ¹⁷ Deus a'õbiat pe acã! Deus pe wuymuju buje, cedağ ma Cristo ağuwẽnuwẽn. Warara'acat muğuykukuku'uk'ũmayũ wuyju. Deus etabutpe wuyju imuwẽnuwẽn. Warara'acat pit warẽmtağ ma Cristo muwẽnuwẽn. Imuwẽnuwẽnapteĩ kay jĩjã dak e'em ip. Tũybe Cristo muwẽnuwẽn pima wuybuyxi jĩjãan ace'e iãn e'em ip. Ixeyũ buxim ğu oceju bit.

3

¹ Warẽmtağ ma eymutaybitbin'ukayũ buxim ğu oceju bit.

— Xipat cĩcã oceju — i'ũmğũ oceju bit e'em warara'acayũ be.

Ijoptup kukat xipat iaptup kay xe'e oceju eyxewi cartadup? Ka'ũma. Kuy ocetaybit eyju xipat iam. Iboaptup kay xe'e eyju ocexewi dak? Ka'ũma. Kuy eyetaybit oceju xipat iam. ² Oceju bit cartadup kay ğu eyxewi Pauloỹ xipat iaptup. Eyju ma ocemudupmubararaktup puxim cartadup puxim. Apẽn eyju cedağ ma jekukum iap co buje soat je'e:

— Paulo xipat. Cedağ ma Corinto ka watwat o'ğutaybitbin — i.

Imên je'e ip apên cuk ikêrêat muğêğêap epeyepere iap co buje dak. ³ Eyju cartadup puxim—Cristo emudup-mubararaktup puxim. Tintadim ġu o'tupmubararak. Wita'a erûn'a be ġu dak opop ibararak. Deus biôğbuk pit cuk eyağuydadam o'e—soat em itabêğat biôğbuk ma. Eyağuydadam o'e ocewebe kawên idipat muwên puje eywebe. Imênpuye eyekukuap cartadup puxim.

⁴ — Oceju xipat — i oceju e'em eywebe, ocetabut cîcã Deus kay buye, Cristo kay dak.

⁵ Deus ocebuywan'ûm pima, iba'ore kuka o'e ocewebe Cristo muwên âm warara'acat pe. Imuwên put ocewebe ixé ocebuywatwan pima acã. ⁶ Ixe ma ocebuywatwan kawên iisuat muwên âm soat ka watwat pe—apên ixé soat ijodiatat taxijo pin iap ekawên muwên âm.

— Soat ekawên tağ eyeku'ûm pima Deus pe wuyawêwêap ekawên tağ, ixé wi wÿy ma epesop eye'û buje — i'ûmğü oceju e'em warara'acayû be. — Ibiôğbuk xipacat eyağuydadam pima, Deus xe ma epesop eye'û buje — i acã oceju e'em.

Wuyawêwêap ekawên tağ jeku ojuy e'em ip adeayû. Jew-edaxijo ojuy dak e'em ip. Iba'ore imênpit cewedaxijo am ip. Imênpuye wÿy ma ip dopdom Deus wi. Ibiôğbuk xipacat wuyağuydadam pima bit, Deus xe acesop soat em.

⁷ Kawên kuyat pit ibararak osodop witadopa be—topaerûnatopa be. Deus dipap o'jebapuk iboap ekawên muwên puje Moisés pe. Idip cîcãat o'jebapuk. Imênpuye Moisés osunuy topa jo ba'ore soat pe jebekitkit pe—Israel naxeğebitbit pe. Topa jo ba'ore osunuy topasopsup puye Deus dipap kuğ. Ğuyjom pit topasopsup ġÿğÿn ā o'e. Imênpit iba'ore soat pe wuyawêwêap ekawên tağ jeku ojuyat wÿy ma jeenuy Deus wi je'û buje. ⁸ Ğasû bit Deus jebiôğbuk moômôm wuywebe soat em wuynuy âm jexe. Iboap idip cîcã wuyxe. Wuyawêwêap ekawên tağ

wuyekuap idip cĩcã. Deus jebiõgbuk muõmõm wuywebe iap pit ibodi ma idip wuyxe. ⁹Iba'ore soat pe wuyawẽwẽap ekawẽn tağ jeku am kawẽn kuyat tağ. Imẽnpuye:

— Ikẽrẽat kuğ eyju oxo — i'e'em Deus soat pe wuywebe. Wuyawẽwẽap ekawẽn pit cekawẽntip. Ibodi ma kawẽn iisuat pit cekawẽntip. Kawẽn iisuat tağ jekukum pima, cũğ ma acesop Deus xe. ¹⁰Moisés Deus dipap o'jojojo kawẽn kuyat muwẽn puje. Cekawẽntip osunuy. Ğasũ bit cũğ ma acesop Deus xe kawẽn iisuat tağ jekukum pima. Kawẽn kuyat podi ma cekawẽntip osunuy kawẽn iisuat. ¹¹Kawẽn kuyat cekawẽntip osodop. Ibut am ğu bit Deus o'e “Iboap ekawẽn tağ cuy epeku,” i. Daream ma. Kawẽn iisuat pit kawẽn kuyat podi ma cekawẽntip. Soat em ma juy iboap ekawẽn tağ ajeku.

¹²Soat em Deus xe acesop iap wiwim cĩcã wuyju. Imẽnpuye wuybisũsũn ğu kawẽn iisuat muwẽn ãm soat pe. ¹³Moisés buxim ğu wuyju. Ixe Moisés pağo ierũnat kuğ osunuy jedopa ajuy am. Ibu'u osunuy jebekitkiyũ be jedopasopsep ğũsũnap coan. ¹⁴Topa jojom ip osodop iğũğũn ã Moisés ebekitkit—Israel naxeğebitbit. Itaybit ğũğũn ma dak osodop ip Deus ekawẽn jedopa eju pağo kuğap co'i ma. Ğasũ dak iba'ore jĩjã ixeyũ etaybin am apẽnape Deus e'em iam cekawẽntup cocom ma'ğũ ip. Cekawẽn pa'arẽm cexe ip kawẽn kuyat. Cristo eju jemũğ puje acã itaybit je'e ip cekawẽn. ¹⁵Wuyawẽwẽap ekawẽntup co buje, ğasũ dak itaybit ğũğũn ma ip—Moisés pe o'ğuwẽn iap ekawẽntup co buje. Itaybit ip yopĩt ma. Jedopa eju pağo kuğat co'ma ip itaybit. ¹⁶Imẽn e'em Deus ekawẽntup:

Deus pağo o'ju'uk Moisés dopa ejuwi cepit puje wuykukukat kay, i.

Imẽnpuxim ğasũ dak wuywebe ikẽrẽat muğeğẽap epere buje Deus ikẽrẽat ju'uk wuywebewi pağo o'ju'ukiap

puxim. Ikērēat ju'uk wuywebewi wuyetabun puje wuykukukat Jesus kay. ¹⁷ Ibodup pe wuykukukat Deus biōḡbuk iape. Ixe wuymuisusun soat em Deus xe wuynūy ām wuye'ū buje. Ixe biōḡbuk wuywebe bima, wuyetaybit wuyju cūḡ ma Deus xe Jesus kay wuyetabut pima acā iam, wuyawēwēap ekawēn taḡ jekukum pima ḡu iam. ¹⁸ Wuyju bit kuy wuyetabut wuykukukat Jesus kay. Jedopa eju paḡo kukat puxim ḡu wuyju. Wuykukukat biōḡbuk wuymuwexaxan wuydip am jejo'i i'eap ojuy. Ixe wuymuwexaxan waroa jo'ian. Wuykukukat dipap ip o'jojojo wuyjojo'ukayū waroa jo'i buye. Imēnpuye biḡ ma wuykukukat co'iyayūm acesop. Imēn ace'e biḡ ma wuydip.

4

¹ Deus ma ocekapikam o'ḡūm ocewebe, itabotaidabotbot ocekapikam buye.

— Kawēn idipat cuy epeḡuwēnuwēn soat kaka daḡ — i juk adi o'e ocewebe.

Imēnpuye ocebu'u ḡu ocesop ocekapikap kuḡ. ² Iba'arēm ikērēat muḡēḡēap pit kuy ocepere. Warēmtaḡ ma ocekuap tak kuy ocepere. Warara'acat muḡuykuku'uk ḡu oceju bit imutabun am ip Jesus kay. Deus ekawēn muwarururun'uk ḡu dak oceju. Soat em ma kawēn icēmat taḡ oceju jekukum Deus etabutpe. Imēnpuye:

— Pauloyū cedaḡ ma jekukum — i'e'em ip soat pe ocekuap cocoyū.

³ Oceju kawēn idipat muwēnuwēn. Ixe ekawēn pit iba'arēm ipiat'ajojoap kay cumayū xe. ⁴ Kawēn idipat kabia buxim. Wuyetaybit Cristo idip cīcā iam kawēn idipat cocom puye. Icēmān Cristo Deus co'i iam tak wuyetaybit ma. Satanás pit ipiat kay cumayū mubu'u'un Jesus kay itabucap puxixim. Ixeyū aḡuymubarēm rēm

kabiok pe imunẽmunẽmap puxim. Imẽnpuye itabut ġu ip kawẽn idipat kay. Ita'umat puxim ip e'em.

⁵ — Ocekay juy eyetabun epesop — i'umġu oceju e'em warara'acat pe. — Jesus Cristo kay juy eyetabun epesop — i acã oceju e'em. — Aġ cuy ixẽ eykukan je'e — i oceju e'em. Jesus Cristo xipat cĩcã ocekay. Imẽnpuye oceju eybuywatwan. ⁶ Kuyje:

— Kabiokat taġwi juy kabiaat je'bapuk — io'e Deus. Ibo kabiaat wuymukabiahã iam co'i ixẽ wuymukũyjom. Ixẽ wuymutaybitbin soat podi ma odip iam. Cristo dak ixẽ jo'i ma jedipap kuġ—Deus co'i ma.

⁷ Deus a'õbacaap kuġ oceju cekawẽn muwẽn ãm. Imuwẽnuwẽn oceju ocebaca ġu ma'ġu. Ka'wi muġẽġẽ'a buxim oceju—yaca'umat'a buxim. Deus acã ya'õbaca. Ixẽ bit oca'õmucanucan jekawẽn muwẽn ã. Imẽnpuye ocekawẽn coco'ukayũ itaybit ja'õbi ġu teyũku imuwẽnuwẽn—Deus a'õbi acã ip imuwẽnuwẽn iam.

⁸ Soat em xipat'umat jebapukpuġ ocewebe. Ocebu'u ġu ma'ġu ocetabut am Jesus kay. Soat em ocaġuybabi'um'um oceju e'em. Ocetabucap pit ocepere ġu imẽnpit. ⁹ Ade ocekay itakomaayũ. Ocebureyũ dak ade ma. Soat em ocekay itakomaayũ ocemupokupoġ. Ocemuy'ũ ġu bit ip imẽnpit. ¹⁰ Soat em ocaoka ojuyap cocom oceju jekukum wuykukukat Jesus puxim. Ixẽ a'õbacaap kuġ pit oceju soat em ma. Iboap ijo but soat pe ocejojo'ukayũ be.

¹¹ Soat em ip ocaoka ojuy jekukum itabut'umayũ Jesus kay ocetabut puye. Ocejebit ma i'um. Oceju bit soat em ma Jesus a'õbacaap kuġ ocesop. Iboap ibapuk cĩcã e'em soat xe ocejojo'ukayũ xe. ¹² Ocaoka ojuyap cocom oceju jekukum, Jesus Cristo muwẽnuwẽn puye. Eyju bit soat em eyetabẽġ epesop Deus xe eye'ũ buje, ocekawẽn kay eyetabut puye.

¹³ Imẽn ibararak opop Deus ekawẽntup pe:

Kuy juk wetabut oce. Iměnpuye juk ocekawěn, i'e'em Deus ekawěntup.

Oceju dak kuy juk ocetabut ajop. Iměnpuye oceju kawěn idipat muwěnuwěn jekukum warara'acayū bit a'ģu ocaoka pin ma. ¹⁴ Deus cuk wuykukukat Jesus o'ģutait ce'ūap tomukadi. Ixe buxim oceju dak ocemutait oce'ūap tomukadi Jesus o'ģutait puye. Ocedujowat jewekay. Eyju dak jeydujowat jewekay. Ixe xe ma acesop soat em. ¹⁵ Oceju juk adi ipiat ocesupi'ajojo Deus ekawěn muwěn ām eywebe. Iměnpuye biģ ma Deus xipat cīcāat ūmūm soat pe eywebe. Iměnpuye biģ ma eyju e'em cebe:

— Xipat cīcā ěn ocekey — i.

Iměnpuye Deus dipap ibapuk e'em adeayū xe.

¹⁶ Apěnpuye kuka wuyģuycūģ ace'e? Ibaça'ūm e'em wuyjebit. Wuybinūn pit iisu e'em, Deus wuya'ōmucanucan puye. Wuya'ōmucanucan biģ ma wuyetabut am Jesus kay. ¹⁷ Wuykay'ūmayū wuykaykay jījā. Ipiatpi'ajojoan cīcā dak ip wuywebe. Iměnpitibun ģu iboap acejukuk—darem ma. Ģuyjom pit Deus jedipap je'ģūm wuywebe. Idipap kuģ acesop. Darem ģu iboap kuģ acesop—soat em ma. Acejepere ģu. ¹⁸ Iměneju wuyju soat em ģebum wuywebe ijo bucat kay ģu—wuywebe ijo ba'oreat kay acā. Wuywebe ijo bucat darem ma dopdom. Wuywebe ijo ba'oreat pit soat em ma dopdom.

5

¹ Wuyjebit xijap'a'a buxim. Wuye'ūap xijap'a'a muy'acap puxim. Wuye'ū buje wuyjebit acejepere ijodi ipi be. Wara'at pit acejat wuyjebin iisuat. Kabi be bima bit wara'at ma je'e wuyjebin. Iisuat ijodiat emumuģē ģu—Deus emumuģē acā. Ibiat kuģ acesop soat em ma. ² Wuyetabikuku jījā wuyjebit iisuat kay, kabi be wuynuy pin cīcā buye. Kabi be bima iisuat acejat wuyjebin.

³ Wara'at acejat wuyjebin iisuat. Wuyjebitbet acesop kabi be bima. ⁴ Ijodi bima, xijap'a'a be iap puxim wuyju e'em. Soat em wuyju ipiat kuḡ e'em. Soat em wuywātaxipi wuyju e'em. Imēnpit wuybu'u je'ũ ām. Iisuat pu pin pit wuyxe wuyjebin. Iisuat kuḡ pima wuyjebit kuḡ, soat em ma wuyetabēḡ acesop. Ace'ũ ḡu. ⁵ Deus ma iisuat o'ḡuḡe wuyjebin. Ixe juk jebiōḡbuk o'ḡuōm wuywebe wuymutaybit am wara'at oḡūm eyjebit iisuat iam.

⁶ Ijodi bima bit puk wuykukukat wi wūy ma wuyju nuynuy—wuyjebit kuyat kuḡ pima. Imēnpuye wuycok-cok cīcā soat em ixe xe acesop iap wiwi am. ⁷ Iboap wiwim wuyju ijojomap tomuju ḡu—wuyetabucap tomuju acā. ⁸ Wuycokcok cīcā wuyetabut am ixe xe acesop iap kay. Kuyat iwat pin wuyju—wuyjebit iwat pin—wuyju am wuykukukat kay. ⁹ Wuykukukat mucokcok pin cīcā wuyju warara'acat mucokcokap podi ma. Imucokcok pin cīcā wuyju ijoce wuyjebit kuyat kuḡ pima, iboma cexe bima dak. ¹⁰ Soat cuy wuyju acejewemubapuk Cristo wap. Acejewemubapuk ixe be “Xipacat eyju oxe” i'e am xipacayũ be, “Ikērēat kuḡ eyju oxe” i'e am ikērēat kukayũ be dak. Cedaḡ ma ixe ideida soat pe wuywebe apēn cuk adi ijodi bima ajekukuku iaptei. Xipacat je'ḡūm xipacat muḡēḡē'ukayũ be xipan cekukuaptei. Ipiat pit supi'ajojoat ikērēat muḡēḡē'ukayũ be ikērēm cekukuaptei.

¹¹ Wuyparara wuykukukat puxim ixe soat podi ma ya'ōbaca buye. Imēnpuye oceju kapikpiḡ cīcā warara'acayũ mutabut am cekay. Imuḡuykukukum ḡu bit oceju imutabucap ojuy ip. Cedaḡ ma oceju imutaybitbin ā ip. Deus itaybit iboam. Eyju dak xe'e eyetaybit iboam?

¹² — Eyetabun cuy epesop okay, xipacat ðn eykay buye — waram pit i'e pin ḡu oxe.

Eyju eycokcok ocekey iap kay oceju. Warara'acayũ bit ocemuy muy acã eywebe. Jewexe ip yoboğãñ kacũğtağ idip puye. Badi bit a'ğũ idip'ũma ip. Oceju bit cedağ ma jekukum ixeyũ a'õmuypit am eymucokcok am tak ocekey. ¹³ Ocadaodao du eyxe “Cedağ ma oceju jekukum” i'e'em puye? Ocadaodao bima, imẽn ma buk oce'e warara'acayũ be “Deus soat podi ma xipat” i'e am. OcağuySAT tu eyxe iboam e'em puye? OcağuySAT pima dak, xipat ma kuka o'e eywebeam. ¹⁴ Soan oceju e'em Cristo xe oceukupin cĩcã buye. Kuy juk ocetaybit ocesop pũğ ağokatkat oe'ũ soat peam ijodiacat peam iam. Imẽnpuye soat ipi juacat yukpi-wat ce'ũ ãm. ¹⁵ Ixe oe'ũ soat peam wuywebeam. Oe'ũ wuywebeam wuybikayap tağ wuyeku am ğũ. Jebikayap tağ jeku am acã oe'ũ. Waram ğuto o'jetait xipat wuykay i'e am.

¹⁶ Kacũğ kay acã wuyju ağ. Imẽnpuye wuy'a bewi wuyju e'em:

— Teku xipat i. — Ğoku xipat ğũ — i dak.

Ğuyjom pit imẽn ğũ ace'e. Wuy'a bewi dak cuk adi ğebum ma ajop Cristo kay kuy bima. Imẽnpuye ijodiat co'i osunuy wuyxe. Ğasũ bit imẽn ğũ wuyju ğebum cekay. ¹⁷ Cristo ejo mũğ'i bima wuyisun ma acesop. Apẽn cuk adi warẽmtağ ma ajekukuku iap kuy oi'ũm. Iisuat acã o'jepoyat. Kuyat pit ka'ũmğũ o'e. ¹⁸ Wuymuisusunap Deus pabi. Ixe wuymuisusun soat tağ Cristo oe'ũ wuywe-beam puye. Kuy bima bit cuk adi a'ğũ wuyetakoma ajop Deus kay. Ğasũ bit ixwuywewexaxan o'e jebureyũm.

— “Deus pe juy epeyewemuxat jebureyũm,” i juy epe'e'e warara'acayũ be — i'e'em Deus wuywebe ğasũ bit.

¹⁹ — Deus pit o'jeğebu ğũ apẽn cuk adi ikẽrẽat epeğũğẽğẽ iap kay. Cristo oe'ũ ikẽrẽat muğẽğẽap teida am puye — i wuyju e'em soat pe. — Jesus kay eyetabun puje

Deus jeymuwexat jebureyũm Cristo oe'ũ wuywebeam puye — i wuyju e'em soat pe ijodiacat pe.

Deus ma juk wuymuju iboam i'e am.

²⁰ Imēneju oceju kawēnwēn eyweju Cristo a'ōbi. Deus ma juk ocemuju jekawēn muwēn ām eywebe.

— Deus ibu'u eywebe jekay'ũmām — i oceju e'em eywebe. — Eymuwexat pin jebureyũm — i oceju e'em eywebe. — Āḡ cuy jeymuwexat jebureyũm — i oceju e'em eywebe.

Deus tak ijoce bima, imēn ma kuka o'e eywebe. Ixe a'ōbi ma iboam oceju e'em eywebe. ²¹ Cristo bit ikērēat o'jukuk ḡu. Pũḡ em tak ka'ũma ma. Deus pit soat wuyju juk adi ikērēat aḡuḡēḡēḡē iap o'jomōḡ Cristo be. O'jomōḡ cebe. Imēnpuye kuḡ ḡu wuydop am. Imēnpuye wuyju Cristo eju mũḡ'i jekukum pima, ikērēat kuḡ ḡu acesop Deus xe. Soat taḡ wuyisu acesop cexe. Imēn ibikuy e'em wuywebe i'e am.

6

¹ Ocebuxim ma eyju dak kapikpiḡ Deus peam. Imēnpuye oceju jeyawē. Kuy juk adi a'ḡu xipat cīcāat epejajat Deus xewi. Waram pit cuy epeyepere ḡu xipacap.

² Eya'ōpicũḡcũḡ cuy epesop Deus ekawēn kay. Imēn Deus e'em:

“Ocedaxijom cuy ece” i eyju e'em owebe bima, kuy juk oya'ĩjojo ey'eap, i. Eydaxijojoap kabia be ma juk ōn eydaxijo, i'e'em Deus.

Eya'ōpicũḡcũḡ cuy epesop. Ḡasũ juy Deus eydaxijo pin. Āḡ cuy ixē ḡasũ bit jeydaxijo.

³ Cũḡ ma oceku pin warara'acat mubu'unap puxim itabucap kay. Ocebu'u jĩjā warara'acayũ be “Ocetabut ḡu juy Jesus kay, ixē a'ōkayayũ warēmtaḡ ma jekukum puye” i'e am ocekuuap cocom puye. ⁴ Cedaḡ ma oceku pin warara'acat itaybit am teyũku Deus buywatwat'ukayũ

iam. Ocekpiceḡe ḡu oceju jekukum, itabut'ũmayũ bit adi a'ḡu oceyayjay jijã ma, ipiatpi'ajojoan ma dak adi a'ḡu ip ocewebe, ka'ũma kuḡ ma dak adi a'ḡu oceju. ⁵ Kuy juk adi a'ḡu ip ocemupokupok itabut'ũmayũ. Te'e ma ip cuk adi a'ḡu ocemuõm daomũnmũnap'a be. Ikẽrẽm cĩcã juk adi ip ocekuk adeayũ e'awero buje ocekũyjoap mubarẽmrẽm ma ip. Kuy juk adi a'ḡu ocejekapikpikpik cĩcã ma. Ocexexet'ũma juk adi a'ḡu, ocejekõnkõn'ũma dak. ⁶ Warara'acayũ itaybit osodop teyũku Deus peam kapikpik'ukayũ iam, cedaḡ ma oceju jekukum puye. Soat taḡ oceisu. Ocekawẽnkẽrẽ ḡu—ocekawẽntip ma. Ocetaybit cĩcã dak kawẽn idipat muwẽn ãm. Ocekpiceḡe ḡu dak warara'acat kuḡ. Warara'acat kuḡ tak xipan oceju. Imẽn oceju bit jekukum xipat cĩcãat biõḡbuk ocekukat puye. Warara'acat kuḡ tak oceju ikukpin. ⁷ Kawẽn icẽmat muwẽnuwẽn acã oceju warara'acat pe. Deus a'õbacaap kuḡ oceju jekukum. Cedaḡ ma oceju jekukum. Imẽnpuye:

— Cũḡ ma juy epeku, Deus cũḡ ma wuykuḡ puye — i oceju e'em itaybit'ũmayũ be. — Ocemuymuy ḡu juy epesop, Deus cũḡ ma wuykuḡ puye — i oceju e'em ocemuymuy ojuyayũ be dak.

⁸ Pũḡpũḡ ocebuyxim ocekuḡ. Warara'acat ocebuyxim ḡu ocekuḡ. Pũḡpũḡ ocemuymuy. Warara'acat xipan ocekuḡ. Pũḡpũḡ te'e ma e'em:

— Pauloyũ napa ma e'em — i.

Icemãn pit oceju e'em. ⁹ Pũḡpũḡ itaybit ḡu ocejum. Adeayũ bit itaybit cĩcã ocejum. Ocetabẽḡ mabuk a'ḡu eyju ocejojom.

— Pauloyũ o'yaoka ip — i'e'em ip te'e ma owebe pũḡpũḡ.

Ade em ipiat'ajojom oceju. Ocaoka ḡu ma bit ip. ¹⁰ Pũḡ em ocemuḡyucũḡcũḡ warara'acat. Soat em pit ocecokcok

oceju e'em. Pũğpũğayũ xe ocedadaibot. Adeayũ muwex-axan pit oceju ibubut adeat puximayũm kawẽn idipat kay itabut ip puye. Adeayũ xe oceju ka'ũma kuğ. Deus xe bit soat kuğ oceju.

¹¹ Oceburereyũ, Corinto ka beayũ, eykukpin cĩcã ocexe. Iba'arẽm ġu juk adi ocejekawẽn eyweju—ocekawẽn ojuy iap tağ acã. Eykukpin cĩcã ocexe iap kuy oceğuwẽn eywebe. Eykay jĩjã oceju. ¹² Ocebu'u ġu juk adi ocesop eykay. Eyju bit cuk adi eybu'u epesop ocekey. ¹³ Okpot eju kawẽnwẽn pimãn puxim õn kawẽnwẽn eyweju. Eybu'um ġu juy epesop ocekey. Apẽn oceju eykay jĩjã iap puxim cuy eyju dak ocekey epesop.

¹⁴ Jesus kay'ũmayũ eju cĩcã ġu juy epeku. Iba'ore cũğ ma jekuku'ukat pe jeburere am warẽmtağ ma jekuku'ukat eju. Iba'ore kabia dağ jekuku'ukat pe jeburere am kabiok tağ jekuku'ukat eju. ¹⁵ Iba'ore Cristo ebekit pe pũğ tağ ma jewağuy am Satanás ebekit eju. Iba'ore itabucat pe itabut'ũmat ağuy dağ jewağuy am. ¹⁶ Iba'ore Deus tuk'a be cucu'ukat pe jeweburedam deusbaro duk'a be cucu'ukat eju. Deus nuynuyap'a buxim wuyju, ibiõğbuk omuy wuywebe buye. Itabẽğat omuy wuywebe. Imẽn Deus cuk adi o'e:

Ixeyũ eju juy oğuy, i. Ixeyũ binũnpe juy oğuy, i. “Ën acã Deusat ocexe,” i je'e ip owebe, i. “Webeitkiyũ eyju,” i dak oce cebe ip, i juk adi o'e Deus. ¹⁷ Imẽnpuye wuykukukat cuk adi o'e: Ixeyũ juy epeyepere, i. Ixeyũ xewi juy epeyewede, i. Ikẽrẽat mujurũğrũğ'ukat ekukuap puxim ġu juy epekuku, i. Ixeyũ buxim ġu jekukum pima bit, õn jeymudot okay, i. ¹⁸ Õn oce eyebay, i. Okpotpoyũm epesop. Odaxiyũm tak epesop, i.

Imẽn cuk adi wuykukukat o'e kuyje—soat podi ma ya'õbacaat o'e.

7

¹ Imên Deus e'em wuywebe, oburereyũ, oxe ikukpinayũ. Xipat cĩcãat ũm pin wuywebe. Imênpuye ikêrêat mujurũgrũgap cuy acepere! Ikêrêat kay ģu juy ģebum ajop! Ibuyxim cuy Deus ajukuk. Ixe be juy acemuisunat soat em ikêrêat kukap puxim.

² Ocekukpin cuy epesop ocekuĝ! Ikêrêm ģu bit oceju soat knĝ—xipan acã. Warara'acat muymuy ģu oceju. Warara'acat muĝuykukukum ģu dak oceju xipacat puap ojuy ocewebeam. ³Iboam õn e'em “Xipat ģu eyju ocexe” i'e am ģu. Imên ma juk adi ocecece eywebe kuy bima. Soat em eykukpin cĩcã ocexe. Eyxe bimaap co'in ma õn wetabêĝ pima, we'ũ buje dak, soat em ma õn ģebum eykay buye. ⁴Wetabut cĩcã eykay. Xipan õn eyawêĝmuwẽnuwẽn soat em warara'acat pe. Oĝuykuku jĩjã ade xipat'ũmat jebapukpuĝ ma'ĝu ocewebe. Yoboĝ cĩcã õn ococokap kuĝ.

⁵Macedônia eipi be ocajêm puje, ocejebodoy'ũma. Xipat'ũmat o'jebapukpukpuk ocewebe soat kaka daĝ pima. Oca'õxixiĝ cĩcã juk adi osodop ip ocekey'ũmayũ. Ocepararan ma juk adi a'ĝu ocekukuku. ⁶Deus pit iĝuy-cũĝat mucokcokcok'uk. Ixe juk adi oca'õmucan Tito ajêm puje. ⁷Oca'õca juk adi oce'e yajêm puje. Yajêm puje:

— Xipan ma juk Corinto ka wat okuk — i juk o'e ocewebe. — Ģebum cĩcã ip eykay — i dak cuk o'e ocewebe. — Iĝuycũĝ cĩcã o'e ip jebure kay—ikêrêat o'ĝuĝê'iat kay — i dak cuk o'e ocewebe. — “Paulo cedaĝ ma juk adi ocawẽwẽn” i'e'em ip — i dak cuk o'e ocewebe. Iboap awẽĝ co buje biĝ ma ococokcok cĩcã oce'e.

⁸Darem ma juk adi eyĝuycũĝ epesop cartadup co buje, wemudupmubararaktup co buje, eymukorẽmaptup co buje.

— Xipat ġu o'e owebe iboaptup mubararak am imukorẽmaptup — i'ũmġu õn pit e'em owebe ma.

Tupco buje juk eyġuycũġ epesop iam wetaybit pima kuka juk õn tak oġuycũġ oce. ⁹ Oġuycũġ ġũ õn pit. Eyġuycũġ cuk adi epesop wemudupmubararaktup co buje. Iboap kay ġu bit ocokcok. Imẽnpit eybu'u juk adi a'ġu epesop ikẽrẽat muġẽ ãm õn eymuġuycũġ puye. Ibo buye ocokcok. Deus ma juk eymuġuycũġcũġ eymubu'unap ojuy ikẽrẽat kay. Imẽnpuye cũġ ma osodop owebe iboaptup mubararak am. ¹⁰ Deus wuymuġuycũġcũġ wuy-mubu'unap ojuy ikẽrẽat kay wuy'eap puxim. Ikẽrẽat kuk am wuybu'un puje ixw wuydaxijom. Ixe be wuydaxijo buje wuyġuycũġap acepere. Wuyocokcok ma acesop. Deus kay'umat iġuycũġ puje bit, ibu'u ġu ikẽrẽat kuk am. Jepereap kay ġu. Biġ ma cekay. Deus tak ixw idaxijo ġu ma. Soat em Deus wi wũy ma jeenuy je'ũ buje. ¹¹ Deus pit eyġuycũġap o'ġuwexat xipacap eywebeam. Ğebum cuy epesop iboap kay. Itapuruġayũm cuk eymuwexat. Omutaybin pin cuk adi epesop ocekwiatpi ġu iam. Eye-takoma jĩjã juk adi epesop ixw kay—ikẽrẽat muġẽġẽ'ukat kay. Eyparara dak cuk epesop ikẽrẽat muġẽap puxixim. Ğebum cĩcã juk epesop wa'õ kay.

— Ipiat cuy asupi'ajoat ikẽrẽat o'ġuġẽiat pe — i juk epe'e eyewewebe.

Imẽneju ibapuk e'em soat xe eyukpiwatpi ġu iap.

¹² Iboadup cuk otupmubararak ixw aġokatkat awẽaptup ojuy ixw be ikẽrẽat muġẽap epereap ojuy. Tup-mubarararaġ pima cebay kay dak ġebum oġuy, jebay mubuyxi'ũm'ũm o'e buye. Cebay kay ġebumap podin ma bit cuk otupmubararak, Deus pe eymuġẽbuap ojuy Pauloyũ ikukpin cĩcã ocexe iap kay. ¹³ Ocecokcok cĩcã juk adi ocekwipin eyxe iam ocetaybin puje.

Tito dak icokcok cĩcã osunuy xipan cĩcã juk adi ixē epejukuk puye. Icocok cuk adi osunuy eyxe bima. Ocekay yajēm puje, ocemucokcokcoğ cuk adi osunuy eyawēğmuwēnuwēn ocewebe. Imēnpuye juk adi biğ ma ocecocok oce'e. ¹⁴ Eykay cum pima:

— Xipan cuk jukuk ip Corinto ka watwat, xipat cĩcã ip puye — i juk oce cebe.

Wa'ō dağ ma xipan cuk adi ixē epejukuk. Omudapxin ġu eyju. Soat em icēmān ōn e'em eywebe:

— Corinto ka watwat xipat cĩcã — i juk adi ocece cebe. Wa'ō dağ ma juk adi xipan ixē epejukuk.

¹⁵ — Wa'ō kay kūyjobit osodop ip — i juk adi o'e Tito ocewebe. — Obuyxim cĩcã juk adi okuk ip — i dak o'e. — Yoboğan pin ġu osodop ip—obuywan pin acã ip osodop — i dak o'e ocewebe.

Ixe Tito ġebum cĩcã xipan cĩcã juk adi okuk ip iap kay. Imēnpuye biğ ma eykukpin cexe. ¹⁶ Ocokcok cĩcã eykay, soat em eya'ō dağ eyju e'em puye.

8

¹ Okitpitpiyū, Deus cuk adi xipacat o'ğūmğūm Jesus kay itabucayū be—Macedônia eipi watwat pe. Ocejū a'ğū ey-mutaybin ojuy iboam. ² Ipiat o'supī'ajojo jĩjã ip jetabucap puyxijom. Icocokap ip yoboğ cĩcã ip o'e imēnpit. Ade jĩjã o'ğūmğūm ip tadaybotbocayū be, tadaybot cĩcã ġu ma'ğū ixeyū dak. ³ Iūm pucat ip o'ğūm. Ibodi ma dak ip o'ğūm. Oca'ōbi ġu ip o'ğūm—jekpiwatpin ma.

⁴ — Ocejū dak cuy oceğūm ocedinheiro eywebe tujowat am Judéia eipi watwat peam—itabucayū beam—tadabotbocayū beam — i juk adi o'e ip ocewebe. Biğ ma — Ocejū dak cuy oceğūm — io'e ip.

⁵ Tūybe yopīt ma je'ğūm ip iān oce'e. Yoboğ ma ip o'ğūm. Koap ip o'jeweūm wuykukukat pe. Wuykukukat

a'õ kay kũyjobit pin cĩcã osodop ip. Oca'õ kay dak kũyjobit pin cĩcã ip osodop. ⁶ Dinheiro ãm pin cĩcã ip osodop ocewebe iap awẽg cocom pima, eykay juk ocesop gẽbum. Imẽnpuye juk ocejekawẽn Tito eju. Kuy bima:

— Eyedinheiro juy epeğuxipan imuju am tadaybotbocayũ be — i juk adi o'e ixex Tito eywebe. Imẽnpuye: — Corinto ka kay juy eju — i juk oce Tito be. — “Eyedinheiro juy epeğuxipan apẽn cuk adi epe'e iap tağ eykukpin ocexe i'e am tadaybotbocayũ be,” i juy ece cebe ip — i juk oce Tito be.

⁷ Warara'acat podi ma eyju ade ikuğ. Warara'acat podi ma eyetabut Jesus kay. Warara'acat podi ma dak eyetaybit Deus ekawẽn muwẽn ãm. Ade ey'in tak itaybit cĩcãayũ. Warara'acat podi ma dak eyju warara'acat puywatwan. Warara'acat podi ma dak ocejukpin eyxe. Imẽneju:

— Warara'acat podi ma dak eycokcoğ cuy epesop eyed-inheiro ãm ãm tadaybotbocayũ be — i oceju e'em eywebe.

⁸ — Eyedinheiro juy epeğũm tadaybotbocayũ be — i'ũmğu õn pit e'em eywebe. Wa'õbi ğu juy epeğũm. Warara'acat pit icokcok cĩcã iũm ãm cebe ip. Eywebe iũm puje, itaybit je'e ip icẽmãn Corinto ka beayũ xe ocejuk pin cĩcã iam tadaybotbocayũ. ⁹ Kuy eyetaybit wuykukukat Jesus soat em xipan wuykuğ iam. Kuyje soat kuğ osunuy, kabi be bima. Ijodi ikop puje bit tadaybocan o'e. Tadaybocan o'e eywebe eycokcoğ eydop am teiboğat kuğiat puxim.

¹⁰ Ğasũ õn jeyawẽ eyed-inheiro epeğuxipan iam. Koapat koato bima:

— Ocedinheiro juy oceğuxipan imuju am tadaybotbocayũ be — i juk adi epe'e'e eyewewebe. Eybu'um ğu juy epesop ğasũ bit imuxipan am. Warara'acayũ iũm ojuy awap, eyju bit cuk adi iũm ojuy epesop. Tadaybotbocayũ buywan ojuy juk adi epesop.

¹¹ — Ğa'a aġuxipan wuyedinheiro — i juk adi epe'e'e eyewewebe.

Eycokcok cuk adi epesop eyedinheiro ūm ām. Ğasū bit eybu'um ġu juy epesop imuju am. Eycokcoġ cuy epesop imuxipan am. Ade ikuġ iap wiwim ġu juy epesop. Epeġuxipan cuy ajo eyju ikuġ iat. ¹² Eycokcokap tomuju iūm puje xipat Deus xe—yoboġ pima, yopīt pima dak xipat ma. Ajo wuyju ikuġ ġu iat ojuyjuy ġu Deus wuyxewi.

¹³⁻¹⁴ Obu'u eymudadaybotbocan warara'acayū ibubut ade i'e am. Ğasū eyju ade ikuġ. Ixeyū bit ikuġ ġu. Imēnpuye cedaġ ma eywebe eyedinheiro'in iūm ām cebe ip—eybubut mu'ē'ē ām cebe ip. Eyju ġu kuka yopīt ikuġ pima, ixeyū ġu kuka o'ġu'ē'ē eywebe. Imēn imu'ē'ē'ēm pima, jewejojo'in ma kuka epe'e ikuġ. Ka'ūma ma kuka tadaybocat o'e. Ka'ūma ma dak kuka ade ikuġiat o'e. ¹⁵ Imēn e'em Deus ekawēntup:

Ade o'jatiat cepoyat kuġ ġu dak o'e, i. Yopīt ma o'jatiat tak ikuġ ma o'e, i.

Imēn e'em tup imu'ē'ē'ē'ukayū muwēġuwēn.

¹⁶ Ocebuxim Tito dak eybuywan pin cīcā. Imēnpuye:

— Bay, ēn xipat — i ōn e'em Deus pe. ¹⁷ “Edaobu'u du Corinto ka watwat com?” io'e buje, — Hm hm. Oju juy ġaxīn ma — io'e. Iju pin o'e. — Ixeyū juy oyawē cedinheiro ūm ām — i juk o'e. Taobikuy jījā osunuy eyjom. ¹⁸ Wara'at tak wuykitpit oceġuju eykay. Ixe ibuyxiat soat xe itabucayū xe, itaybit cīcā kawēn idipat muwēn ām puye. ¹⁹ Jesus kay itabucayū ixē o'taē oceweju iju am dinheiro dujowat am Jerusalém ka be. Dinheiro juy ocetujowat eykukpin cīcā ocexe iap mubapuk am tadaybotbocayū be. Ocetujowat cuy jewebuywatwan cīcā ip wuykukukat kay itabucayū iap mubapuk am soat pe. Imēnpuye:

— Ka'ũmǵu ejo'iat xipacat — i je'e ip Deus pe dinheiro jeejat'iaiyũ.

²⁰ Ade dinheiro juy ocetujowat. Ocebu'un ma'ǵu warara'acat pe “Pauloyũ dinheiro'in ma o'ju'uk jew-ebeam” i'e an. Imẽnpuye warara'acayũ ocetujowat oceweju ocemuymuyap puxim. ²¹ Cũǵ ma oceku pin wuykukukat etabutpe acã ǵu. Soat etabutpe ma oceku pin cũǵ ma.

²² Imẽnpuye wara'at wuykitpit cuy oceǵuju eykay. Kuy juk adi ixecesubuyxijojo ade em. Imẽnpuye ocetaybit cĩcã ixec soat em warara'acat puywat pin iam. Itabut cĩcã eykay. Imẽnpuye:

— Corinto ka watwat tak jedinheiro jeeǵum ma tadaybotbocayũ be — i'e'em ixec.

Imẽnpuye ixec eyjo pin cĩcã eybuywat am imuju am. Ibũrũ ma oceǵuju eykay wuykitpitpiyũ. ²³ Tito obure jĩjã. Ixekapikpiǵ oweju eybuywatwan. Ixeyũ wuykitpitpiyũ cum ceweju eykay. Itabucayũ a'õbi cum ip. Ibuyxim ip Cristo kuǵ. ²⁴ Eykay yajẽm puje juy ikukpin epejukuk ip. Imẽnpuye soat itabucayũ itaybit je'e Corinto ka watwat xecixeyũ ikukpin cĩcã iam.

— Corinto ka watwat xipacat cĩcã iap ocetobuxik apẽn soat em Pauloyũ e'em iap taǵ — i je'e ip.

9

¹ Obu'u oce warara'acayũ bit jedinheiro mujujum itabucayũ be Judéia eipi beayũ be iaptup mubararak am eywebe, ² kuy eyju dak ixeyũ buywan pin puye.

— Tadaybotbocayũ buywan pin ip wuykitpitpiyũ Grécia eipi beayũ — i kuy juk oce Macedõnia eipi beayũ be. — Kuy bima ma juk adi ip osodop ibuywan pin—koapat koato bima ma — i juk adi oce cebe ip.

Ade ixeyũ'in ibuywan pin o'e eyju ibuywan pin ip iam itaybin puje.

³ — Corinto ka beayũ kuy juk jedinheiro o'ğuxipanpan ocewebe tujowat am iũm ãm tadaybotbocayũ be — i juk adi ocece cebe ip.

Eyedinheiro muxipan'ũm pima bit, kuka juk eyju wawẽğmukẽrẽrẽn. Imuxipan'ũm pima:

— Napa ma juk Corinto ka beayũ eğuwẽn ocewebe — i kuka o'e ip owebe. Obu'u wekawẽn mukẽrẽrẽn ãn eywebe. Imẽnpuye wuykitpitpiyũ juy oğuju eykay eywebe imuxipan'ũmap puxim. ⁴ Oweju Macedônia eipi beayũ ajẽm puje, ocesũsũn kuka oce'e eykay, eyedinheiro muxipan'ũm pima. Ocebodi ma eyju dak kuka eysũsũn ma epe'e te'e ma ocetabut eykay buye. Õn tak kuka osũsũn ma oce “Corinto ka beayũ jedinheiro muxipanpan je'ğũm” i, te'e ma ocece buye. ⁵ Imẽnpuye ixeyũ wuykitpitpiyũ oğuju eykay. Oajẽm awap ma oğuju ip eybuywat am soat muxipan am. Epeğuxipan cuy apẽn cuk adi epe'e'e iap tağ. Oajẽm puje, kuy ixipan je'e. Ixipan pima, warara'acat itaybit je'e Corinto ka beayũ jedinheiro o'ğũm iũm pin puye iam. Warara'acat a'õbi ğu o'ğũm ip iam itaybit je'e ip—jekpiwatpin ma ip o'ğũm iam.

⁶ Ade ğu taidada'ukat yopĩt ma ibubum. Ade taidada'ukat pit ade ibubum. Ğebum cuy epesop iboap kay. ⁷ Eybu'u iũm pima bit cuy epeğũm ğu. “Eğũm cuy” i'e'em pima dak, epeğũm ğu. Eyukpiwatpin ma juy epeğũm. Bũrũ poro iũm pin cuy epeğũm. Jecokcoğ iũmũm'ukat kay jĩjã Deus. ⁸ Deus pe bit iũm put eywebe eyemukaypinput. Soat je'ğũm eywebe. Soat em epesop eyemukaypinput kuğ. Ajo eyju cekayiat podi ma dak je'ğũm eywebe. Cepoyat kuğ tak epesop iũm ãm warara'acat pe—xipan i'e am ip cebe. ⁹ Imẽn e'em Deus ekawẽntup:

Deus yopĩt ġu iũmũm tadaybotbocayũ be yoboġ ma, i.
Soat em xipan ip ikuġ, i.
Imẽn e'em Deus ekawẽn tup.

¹⁰ Deus tarekrektata ũmũm wuywebe taida am. Kadai muaypapan tak wuywebe i'o am. Imẽnpuxim eywebe dak ade ma je'ġũm eyemukaypinput. Soat em epesop cepoyat kuġ tak. Ixe buxim eyju dak yopĩt ġu epeġũm tadaybotbocayũ be—yoboġ ma. ¹¹ Cepoyat kuġ ma epesop soat em ixe xipan eykuġ puye. Ibubut adeayũ buxim epesop warara'acat pe iũm ãm. Imẽnpuye:

— Bay, xipat cĩcã ěn! Corinto ka beayũ ade juk o'ġũm Pauloyũ be tojot am ocewebe — i je'e ip Deus pe tadaybotbocayũ—Judéia eipi beayũ.

¹² Eywebe iũm puje, tadaybotbocayũ buywatwan epe-seop—Deus ebekitkit puywatwan.

— Bay, soat podi ma ěn xipat — i je'e ip Deus pe, epeġũm puye.

¹³ Icockok cĩcã je'e ip.

— Bay, ka'ũmġu ejo'iat xipacat — i je'e ip Deus pe. — Bay, tacup ġu iũmũm ip Corinto ka beayũ — i je'e ip cebe. — Soat em tadaybotbocayũ buywatwan ip — i je'e ip. — Cristo kay jetabucap mubapukpuġ cĩcã ip ocebuywatwan pima, warara'acat puywatwan pima dak — i je'e ip Deus pe. — Cristo ekawẽn taġ cĩcã ip jekukum — i je'e ip Deus pe.

¹⁴ Imẽnēju soat em jekawẽnwẽn jeedop ip Deus eju eywebeam, eykukpin cexe ip puye.

— Bay, ěn xipan cĩcã ocekuġ — i je'e ip Deus pe. — Tacum ġu juk ocekuġ ip Corinto ka beayũ dak. Ocekuġpin cĩcã juk ip ocekuġ, kuy bima ěn ixeyũ ikukpin ejukuk puye — i je'e ip Deus pe.

¹⁵ Icēmãñ Deus warara'acat podi ma wuykukpin wuykuḡ. Teimuweḡũñ pa'oreatei iumat puxim jekpot o'ḡudot wuykay. Imēnpuye:

— Warara'acat podi ma ěñ xipan ocekuḡ — i juy ace cebe.

10

¹ Ōñ Paulo. Deus omudot eymutaybin am. Deus a'ōbi ōñ jeyawē. Apēñ Cristo wuyawēwēm iap puxim ma ōñ tak wa'ōkadidim ma jeyawē. Ixe Cristo ya'ōkadidim ma wuykuḡ. Xipan ma wuykuḡ. Eyju bit:

— Paulo ya'ōpuruḡ ocemukorēm rēm wũy ocewi bima. Ijasũñ ocexe bima bit iparara ocebuxim — i te'e ma e'em.

² Obu'u wa'ōpuruḡ eymukorēm ãm. Warēmtaḡ mabuk eyju jekukum pima bit, wa'ōpuruḡ ma ōñ jeymukorēm.

— Paulo Deus a'ōbi ḡu jekukum—ja'ōbi acã—jewekay acã ḡebum itabut ūmat puxim — i napa ma eyju e'em eyewewebe pũḡpũḡ ey'in.

Wa'ōpuruḡ ma omuymuy'ukayũ oḡukorēm eykay wajēm puje. ³ Ijodi wuyju dopdom itabut'ũmayũ parakpe.

Wuya'ōbacaam ḡu bit wuyju jekukum imutabunap ojuy ip. ⁴ Ijodiat a'ōbacaap kuḡ ḡu wuyju bit jekukum,

Deus a'ōbacaap kuḡ acã. Ixe a'ōbacaam acã Satanás a'ōkayayũ a'ōbacaap aceḡu'ũm. Wuyju ya'ōbacaap kuḡ pima, wuya'ōmuypit pa'ore cebe ip Deus kay'ũmayũ be.

⁵ Yoboḡan pin ip. Wuymubu'u'un ojuy ip jekukum Deus kay wuyetabucap puxixim. Jaḡuybi ma jewa'ōxixiḡ ip ceweju imubu'unap ojuy Deus kay. Wuyju Deus a'ōbacaap kuḡ pima bit, ixeyũ a'ōxikap aceḡu'ũm. Aceḡuymũḡ ip. Mũḡ ma jeedop ip. Imuymũḡ puje adeayũ itabut je'e Deus kay. Cristo a'ō kay dak kũyjobin jeedop ip.

⁶ Koap ixē a'ōbacaam ōñ jeymubikuy kũyjobit am Cristo

a'õ kay. Eyekũyjobin puje, ipiat acesupi'ajoat soat pe kũyjobit'ũmayũ be.

⁷ Kacũg tağ acã eyju pũğpũğpũğ ağ. Eyxeat te'e ma e'em eywebe:

— Õn acã Cristo a'õbi jekukum—Pauloyũ bit ka'ũma — i. Ixe juy jeenuy jewağuyğuy Cristo a'õ dağ paxi õn jekukum iap kay. Ixe jo'i oceju dak Cristo a'õbi jekukum.

⁸ — Wuykukukat cuk onaẽ eymutaybitbin am — i juk adi ocece eywebe.

Obisũsũn ģu oce iboap muwẽn ãm ģuto eywebe. Icẽmãn õn cemunaẽ. Ya'õbiat õn. Ixe juk onaẽ eymukorẽmrẽm'ukan ģu—eybuywatwat'ukan acã. Eybuywat am cuk onaẽ biğ ma eyju kũyjobit am Deus biõğbuk a'õ kay. ⁹ Eymupararan pin ģu õn wemudupmubararaktum cartadum. ¹⁰ Okay'umat pit aco'i je'e:

— Paulo ya'õpuruğ ocemukorẽmrẽm jemudupmubararaktum — i. — Ocexe bima bit, ya'õkadidim ocekuğ — i dak aco'i je'e. — Ya'ĩjo pin'ũma dak ocexe warẽmtağ kawẽnwẽn puye — i dak aco'i je'e napa ma.

¹¹ Wũy õn eywi bima wemudupmubararaktup eyweju õn kawẽnwẽn iap co'i ma je'e. Itaybit je'e ip iboam okay'ũmayũ—ocemuymuy'ukayũ.

¹² Pũğpũğ ey'in te'e ma e'em:

— Warara'acat podi ma oceju xipacap kuğ — i. — Ixeyũ bodi ma oceju bit xipacap kuğ — i'ũmğũ õn pit e'em eywebe.

Ajom itaybit ip? Ka'ũma ma. Jağuybin ma ip e'em: — Cedağ cĩcã oceju jekukum — i.

Deus ağuy dağ ģu ip jewağuyğuy—jağuy dağ acã. ¹³ Deus ocemujum'ũm pima:

— Deus a'õbi oceju jekukum — i'ũmğũ bit kuka oce'e.

Poma Deus ocemujum iap tağ acã oceju cucum. Eykay bit cuk ocemuju kapik am eyweju—eymutaybit am Deus ekawën. ¹⁴ Deus cuk ocemuju eyka kay. Imënpuye juk adi Deus a'õ kay küyjobin ocesop, eykay ocajëm puje. Eykay juk ocajëm kawën idipat muwën ãm eywebe—Cristo muwën ãm eywebe. ¹⁵ Warara'acayũ dak cuk adi eymutaybitbin osodop ip Cristo ekawën. Imënpuye:

—Oceju acã juk adi ocesop Corinto ka watwat mutaybitbin — i'ümğü oceju e'em.

Biğ ma jeuru'urum eyetabucap kay oceju. Ğasũ ma oceju kapig eyweju biğ ma Cristo ekawën muwën ãm soat pe. Ğasũ ma oceju eymutaybin ojuy. Imënpit poma Deus ocemujumatka kay acã oceju. ¹⁶ Eyka be imuwën epere buje, eyka bodiatka kay oceju imuwën ãm. Ka'ũma ma buk kawën idipat o'ğuwën iatka be oceju. Imënpuye “Paulo bit kawën idipat muwënuwën kuy o'ya'ijoje'iaiyũ be acã” i'e ba'ore je'e soat pe.

¹⁷ Imën e'em Deus ekawëntup:

“Xipat cĩcã oceju bit” i'ümğü juy ace, i. “Ocekukukat acã xipat cĩcã” i acã juy ace, i.

¹⁸ “Xipat ma oceju” i wuyju e'em pima, abu xe xe'e wuyju xipat? Ka'ũma xe ma. “Xipat ma eyju” i'e'em Deus wuywebe bima bit, wuyju xipat ma.

11

¹ Yadaodaot puxim õn kawënwën eyweju. Imënpit cuy eyukpiceğëm ğu epesop okay. Ğğ puk cuy ocekawën eyweju. ² Apën Deus yağuybabi'üm eykuğ iap puxim õn tak wağuybabi'üm eykuğ. Eybay buxim õn tak wağuybabi'üm eykuğ. Ağokatkat eju o'jepo ğu bukiat puxim eyju. Cebay bit kuy ibumũğãm o'tobuxik iwadim iap puxim eyju. Ibumünmën'ümat soat kay ğu—jewadip kay acã. Imënpuxim obikuy eywebe Cristo kay jĩjã ãm

warara'acat kayap podi ma. Obikuy eywebe soat tağ eyisu eydop am. ³ Wağuybabi'üm eykuğ. Warara'acat kayap podi ma eyju Cristo kay ġasũ. Jewexe ġu eyju cekay. Warara'acayũ bit eyağuyumuwarururunap ojuy. Eymuğuykuku ojuy ip. Cristo kay ey'eap epereap ojuy ip. Imēnpuxim Satanás Eva o'ğuykuku kuyje. ⁴ Ocejju juk adi Jesusat oceğuwēnuwēn eywebe. Eymuğuykuku ojuyayũ bit Jesus iwaruat muwēnuwēn eywebe. Te'e ma eycokcok ixeyũ ekawēn kay. Ocejju juk adi Deus biōğbuk oceğuwēnuwēn eywebe. Eymuğuykuku ojuyayũ bit ibiōğbuk iwaruat muwēnuwēn eywebe. Inaka te'e ma eycokcok ixeyũ ekawēn kay. Ocejju juk adi kawēn idipat acã oceğuwēnuwēn eywebe. Eymuğuykuku ojuyayũ bit kawēn iwaruat muwēnuwēn eywebe.

— Ijop ma kawēn idipat — i napa ma e'em ip eywebe. Inaka te'e ma eyetabut ixeyũ ekawēn kay.

⁵ Eyxe bit ixeyũ warara'acat podi ma ya'ōbuyxi jewexe ma'ğũ ip Deus emumujuyũ. Ōn pit ixeyũ jo'i ma wa'ōbuyxiap kuğ. ⁶ Ōn pit wetaybit cĩcã ġu imēnpit kawēn ãm. Wetaybit cĩcã bit apēn ōn e'em iam. Soat em cuk adi wetaybicap osodop ibapuk eyxe.

⁷ Ōn kawēn idipat muwēnuwēn eywebe bima ka'ũma ma ojat eyxewi imuwēnuwēnapteim. Imēnpit:

— Paulo ya'ōbuyxiat ġu aco'i teihem'ũma kapikpiğ puye — i'ümğũ juy epe'e'e owebe.

Cedag ma osodop teihem ġu imuwēn ãm eywebe. ⁸ Ōn kawēn idipat muwēnuwēn eywebe bima dinheiro mudodot'uk osodop ip wara'at ka beayũ itabucayũ. Jewexe ma ōn cuk adi tujupa'um'um oğuy ixeyũ xewi teihem'ũma imuwēn ãm eywebe. ⁹ Wuykitpitpiyũ juk adi oajēm Macedônia eipi bewi. Soat cuk adi o'tojot ip owebeam wemukaypinput. Imēnpuye ka'ũma ma juk adi ojoojuy eyxewi. Ikuğ'üm pima dak “Dinheiro'in puk” i ġu oce

eywebe. Pũğ em tak ka'ũma ma. Kuy bima dak juk adi ojuoyũ ġu ma dinheiro eyxewi. Ğuyjom tak ojuoyũ ġu ma. Puju dinheiro ojuoyũ eyxewi? Ka'ũma em ma. ¹⁰ Abu ideidaat owebe? Ka'ũma ma. Teihem ġu õn pit kawẽn idipat muwẽnuwẽn soat pe Grécia eipi watwat pe. Icẽmãn õn e'em. Napapa'ukat ġu õn, Cristo a'õkayat puye.

¹¹ — Ën iojuoyũyũ ġu ocexewi oceukupin ġu exe buye — i te'e ma eyju e'em owebe.

Eyukupin cĩcã oxe. Deus itaybit iboam.

¹² — Pauloyũ jo'i oceju dak kapikpiğ — i'e ojuy ip jewexe Deus ekawẽn muwẽnuwẽn'ukayũ. Õn pit teihem ġu kawẽn idipat muwẽnuwẽn. Imẽnpuye ibo i'e ba'ore cebe ip, imuwẽnuwẽnaptei bubum ip puye. Ğuyjom tak teihem ġu oğuwẽnuwẽn. ¹³ Ixeyũ bit icẽmãn ġu Deus emumujuyũ. Jewexe ip Deus emumujuyũ.

— Ya'õbi oceju dak Deus ekawẽn muwẽnuwẽn — i e'em ip napa ma.

Warara'acayũ muğuykukukum ip oceju dak Cristo emumujuyũ iam.

¹⁴ — Apẽn kuka itabut o'e ip imuğuykuku'ukayũ a'õ kay Corinto kay beayũ? — i'Ûmğũ õn pit e'em owebe ma.

Satanás pit cewemuwexat put Deus ekawẽn tojotjot'ukat co'ian. Deus ekabia dağwiat co'ian cewemuwexat put wuymuğuykuku ojuy. ¹⁵ Imẽnpuxim cebekitkit tak cewemuwexat put xipacat muğẽğẽ'ukat co'iyũm wuymuğuykuku ojuy. Ipi'ũm puje bit, xipat'ũm cĩcãat je'jat ip wuymuğuykukukuaptem. Cedağ ma Deus ideida cebe ip.

¹⁶ — “Paulo yadaodao,” i'ũmğũ juy epe'e — i õn e'em waram eywebe.

Wadaodao eyxe bima dak cuy wa'ijom ma epe'e. Jewexe Deus ekawẽn muwẽnuwẽn'ukayũ buxim õn tak e'em eywebe “Xipat cĩcã õn” i. ¹⁷ Wuykukukat a'õbi ġu õn

kawēnwēn eywebe ḡasū bit—wukpiwatpi ma. “Xipat cīcā òn” i'e'em pima yadaodaot puxim ma òn tak kawēnwēn.

¹⁸ Warara'acayū e'em — Xipat cīcā òn — i eywebe, ya'ōbuyxian pin ip eyxe buye.

Imēnpuxim òn tak: — Xipat cīcā òn — i oce eywebe.

¹⁹ Jewexe ma eyetaybit cīcā. Yadaodaoyū jo'iyū kay jījā bit eyju! ²⁰ Eyaḡuy'ūm cīcā. Ixeyū kay jījā eyju, ya'ōpuruḡ cīcā ma'ḡu eymujujum ip; eymudadaybotbon ma a'ḡu ip; eymuḡuykukukum ma a'ḡu ip; warēmtaḡ ma a'ḡu ip eykuḡ; eyukpiokakakam ma a'ḡu ip eykuḡ. ²¹ Oceju bit cuk a'ḡu ocesūsūn ocesop eykuk am imēn.

Warara'acayū e'em: — Xipat cīcā òn — i eywebe.

Ixeyū buxim òn tak jeymukūyjo òn ḡasu òn xipat cīcā iam. Eyetaybit òn yadaodaot puxim kawēnwēn iam.

²² — Hebreuyū bit oceju icēmān — i'e'em ip eywebe jewexe Deus emumujuyū.

Òn tak ibiat ma.

— Israel naxeḡebitbit pit oceju — i'e'em ip eywebe.

Òn tak ibiat ma.

— Abraão naxeḡebitbit pit oceju — i'e'em ip eywebe.

Òn tak ibiat ma.

²³ — Cristo buywatwat'ukayū bit oceju — i'e'em ip eywebe. Ixeyū bodi ma òn pit Cristo buywatwat'ukat xipacat. Ixeyū bodi ma juk adi ocekapikpik cīcā Cristo beam, yadaodaot puxim ma'ḡu òn kawēnwēn ḡasū eywebe. Ixeyū muōmōmap podi ma juk adi omuōmōmōm ip daomūnmūnap'a be. Ade em juk adi ip wukxabiokakaka ixee muḡēḡēbum. Ade em ma oje'ū pinpin.

²⁴ Cinco em Judeuyū kukuk'ukayū wukxabiokaka ixee muḡēḡēbum—icaat yabi beatpum. Ade em wukxabiokaka ip—39 em ma. Soat em ip ibūrū em ma wukxabiokaka.

²⁵ Ebapūḡ em cuk adi wukxabiokaka im Roma ka kukat ebekitkit. Pūḡ em cuk adi wabuḡbuḡ ip wita'am okay

itakomaayũ. Ebapũğ em cuk adi oakõmkõm tiboğati be kobexixi epiriğ puje—odujowat ojuyat epiriğ puje. Pũğ em pit tibi'adopa dağ ojeku—kabiabun, iximabun tak. ²⁶ Soat kaka dağ cucum pima ade em cuk adi waoka ojuyap cocom ojekuku. Idibi adi o'tiõm ukã be bima adi oje'ũ pin tiboğ puje. Ibukurukayũ dak cuk adi oaoka pin osodopdopdop. Obadipyũ dak cuk adi oaoka pin osodopdopdop—Judeuyũ kukuk'ukayũ. Judeu'ũmayũ dak cuk adi oaoka pin osodopdopdop ade em ma. We'ũ pinap cocom cuk adi ojekukuku ikaboğatka dağ, uk'a'ũmat tağ tak, tiboğcĩcãati dağ tak. Jewexe obureyũ dak cuk adi oaoka pin osodopdopdop. ²⁷ Soat em cuk adi ocekapikpik cĩcã. Soat em odaobire juk adi ojekukuku wekapikap tağ. Xexen'ũma juk adi ojekukuku. Ade em cuk adi ojekukuku oxat'ũmğu, odotiũm tak, oxexecap'a'ũmğu dak. ²⁸ Imẽn ma õn jekukum ipiatpi'ajojom. Wağuybabi'ũm tak itabucayũ kuğ—soat ka becat kuğ—Jesus ekawẽn kayayũ kuğ cedağ ma paxi a'ğu ip jekukum iam. ²⁹ Itabucat warẽmtağ ma oeku bima, õn tak ixex buxim ma oğuycũğ kuka oce. Ikẽrẽat muğẽ buje dak, õn tak wağuybabi'ũm cĩcã oce ip ikuğ.

³⁰ Ade em wa'õbaca'ũmap ibapuk e'em soat pe. “Xipat cĩcã õn” i'e ojuy bima, wa'õbaca'ũmap kuka oğuwẽn. ³¹ Deus itaybit õn napa ğu e'em eywebe iam. Ixe ma wuykukukat Jesus Cristo ebya.

— Soat podi ma ěn xipat — i wuyju e'em cebe—Deus pe. ³²⁻³³ Õn Damasco ka be bima ibo ka kukukat oaoka ojuy o'e. Imẽnpuye jeka wiwi'ukayũ o'ğuju jeka ekorara exĩntbi wiwi am odaomũnap ojuy. Obureyũ bit cuk adi odaxijo. Pağeiro'aboğ pe ip omukop ika ekorara tok tağwi. Imẽn ocenapõn waoka ojuyacat xewi—Aretas a'õbi ika kukukat xewi.

12

¹ Te'e ma wuyju e'em:

— Xipat cĩcã õn — i warara'acat pe. Imēnpit puk jeymukũyjo õn xipat cĩcã õn iam. Ade ma juk adi ojojojo wexey jo'iat pe idip cĩcãat. Wuykukukat tak cuk adi soat ma o'ğubapukpuk owebe omutaybit am. Iboap cuy oğuwēn xipat cĩcã õn iam eymukũyjo am. ² Kuy bima Deus cuk odujuu jewekay kabi kay—bodiat ka kay. Kuy quartoze koato o'kap pima juk adi odujuu. Õn xe'e odujuu? Wexeybi ġu xe'e odujuu? Wetaybit ġu toto. Deus acã itaybit. ³ Dao ma juk adi odujuu ikadip cĩcãatkay kay Deus tũytũyapka kay.

Õn xe'e odujuu? Wexeybi ġu xe'e odujuu? Wetaybit ġu toto. Deus acã itaybit — i õn e'em waram.

⁴ Kawēn idip cĩcãat cuk adi oya'ĩjojo ibodi. Imuwēn pa'ore eywebe iboap. Ka'ũmğū wuya'õ kawēn iboam eymukũyjo am.

⁵ — Xipat cĩcã õn — i kuka oce warara'acat pe, iboap ojojojo buye.

Imēnpit obu'u imēn i'e am. Soat xe e'em ibapuk wa'õbaca ġu iap.

— Xipat cĩcã õn — i'ũmğū oce warara'acat pe. — Wa'õbuyxi ġu õn — i acã oce cebe ip.

⁶ “Xipat cĩcã õn” i'e pin pima bit wadaodao ġu kuka oce. Napa ġu kuka oce eywebe. Icēmān kuka oce. Kuy juk wekukuap epejojojo. Wekawēn tak cuk kuy epeye'ĩjojojo. Õn xipat ġu ma'ğū eyxe bima bit, “Xipat cĩcã õn” i ġu oce eyağuymuwarurun am okay i'e am.

⁷ Idip cĩcãat cuk adi ojojojo wexey jo'iat pe. Imēnpuyē:

— Jeweweju yoboğan pin cĩcã aco'i je'e Paulo — i juk o'e Deus jewebe ma.

Imēnpuyē soat em õn jekukum owātaxipi jewexe oboğan o'eap puxim. Ipiatpi'ajojom õn jekukum. Deus a'õbi acã

Satanás cuk omuwãtaxipin. Deus a'õbi ma owãtaxipi õn jekukum jewexe oboğan o'eap puxim.

⁸ — Owãtaxipiat eju'uk owebewi — i juk adi ocece wuykukukat pe.

Ebapũğ em cuk a'ğũ oce cebe imẽn.

⁹ — Oju'uk ğũ ewãtaxipiat — io'e owebe. — Soat em pit õn xipan jekuk — io'e. — Wa'õbacaap oğũm ewebe — io'e. — Wara'at kay ğũ bit eğuy — io'e. — A'õbaca'ũm pima, biğ ma wa'õbacaap ejat — i juk o'e owebe.

Imẽnpuye wa'õbaca'ũmap kuğ ma ocokcok.

— Wa'õbaca õn pit — i'ũmğũ õn e'em warara'acat pe.

Cristo soat kabia ja'õbacaap ũmũm owebe wa'õbaca'ũm puye. Imẽnpuye ocokcok cĩcã wa'õbaca ğũ ma'ğũ. ¹⁰ Soat em ocokcok õn e'em wa'õbaca ğũ ma'ğũ; okay'ũmayũ dak a'ğũ omuymuy ma; yopĩt ma dak a'ğũ õn jekukum ikuğ; itabut'ũmayũ dak a'ğũ ipiatpi'ajojoan owebe; xipat'ũmat tak a'ğũ jebapukpuğ owebe. Imẽn ma ipiatpi'ajojom õn jekukum Cristo a'õ dağ õn jekukum puye. Inaka soat em ocokcok õn e'em. Wa'õbaca'ũm pima, wuykukukat ja'õbacaap ũmũm owebe buye.

¹¹ Xipan kuka a'ğũ eyju bit omuwẽnuwẽn. Imẽnpit xipan ğũ eyju omuwẽnuwẽn. Imẽnpuye yadaodaoat puxim õn ma xipan jewemuwẽnuwẽn eywebe. Ka'ũma jo'i ma õn eyxe. Jewexe Deus emumujuyũ bit ijo'i ip eyxe. Ajo muğẽğẽm ip imuğẽ ba'ore owebe iat? Ka'ũma ma. ¹² Õn eyxe bima juk adi Deus a'õbacaap oğubapukpukpuk eywebe. Ixe a'õbacaam wuywebe imubapuk pa'oreat tak cuk adi oğubapukpukpuk soat etabutpe eyetabutpe. Iboap mubapuk puje eyetabẽğbẽğ epesop ijojom idip cĩcã eyxe buye. Wukpiceğẽ ğũ juk adi oğuy iboap mubapuk am eywebe. Iboap coco buje juk eyetaybit epesop õn Deus emumuju iam Deus emumuju acã iboap mubapukpuğ puye. ¹³ Wara'atka be bima juk adi wemumukaypinput

ũmũm'uk osodop ip owebe ibo ka watwat—itabucayũ. Eyxe bima bit cuk iojuyjuy'uk ġu oġuy eyxewi. Apẽnpuye “Paulo jemumukaypinput ojuyjuy'uk ġu wuyxewi,” i eyju e'em eyewewebe?

— Wuykay ġu xe'e? — i te'e ma eyju e'em.

Imẽn ġu bit cuy epe'e. Eykay ma'ġu õn.

¹⁴ Xepxep em cuk ojeku eyjom. Ġasũ dak waram oju pin eyjom. Eyju bit cuy ojuapte epeteida ġu. Eyedinheiro kay ġu õn. Eykay acã õn okay am. Webekitkit puxim eyju. Bekitkiyũ ma jedinheiro muxipanpan ġu jebay beam, jexi beam tak. Aġokatkayũ bit jedinheiro muxipanpan jekpotpoyũ beam, jedaxiyũ beam tak. ¹⁵ Ocokcok cĩcã soat obubut ũm ãm eywebe eybuywat am. Obu'u ġu we'ũ ãm tak eybuywacap ojuy. Biġ ma õn eykay e'em. Eyju ġu xe'e biġ ma okay ġu e'em?

¹⁶ Soat ma aco'i eyju e'em eyewewebe: — Icẽmãn wuyedinheiro aġu'ũm ġu Paulo beam — i.

Pũġ pit aco'i je'e napa ma:

— Ixe bit cuk adi ocemuġuykukuku — i. — Ixe juk adi ade aco'i o'tujupa'um ocexewi napaap tomuju ma — i dak aco'i je'e napa ma.

¹⁷ Eymuġuykukuap ojuy ġu dak obureyũ juk oġuju eykay.

¹⁸ Tito juk oġuju eykay. Wara'at tak wuykitpit cuk oġuju eykay. Ajo dak ip o'tujupa'um eyxewi jebubun? Ka'ũma ma! Õn, Tito dak jewejo'ĩ ma oceju. Cedaġ ma oceju jekukum. Warara'acat muġuykukuku'uk ġu oceju.

¹⁹ — Pauloyũ jewedayoyom ocewebe, yoboġan pin puye — i te'e ma eyju e'em.

Jewedayoyom ġu oceju bit. Cristo a'õbi oceju kawẽnwẽn eywebe Deus etabutpe. Oburereyũ, eykukpin ocexe. Soan ma oceju e'em eybuywat am acã. ²⁰ Eykay wajẽm puje iwarum ma aco'i õn jeydobuxik. Apẽn õn cekay iap co'i ġu aco'i õn jeydobuxik. Eyju dak imẽn ma odobuxik. Apẽn

eyju cekay iap co'i ġu aco'i eyju odobuxik. Jewa'ōxikiġ aco'i ōn jeydobuxik, eyetabutkarey dak eyewewekay, eyetakomāmā dak eyewewekay. Warara'acat kay dak eyju ġebum ġu—eyewewekay acā. Jewemuymuy aco'i ōn jeydobuxik, eyekawēnkērē dak, yoboġan pin tak. Pūġ taġ ġu dak aco'i eyju jekukum—wara'at taġtaġtaġ ma. Imēn ōn eydobuxik puje oġuycūġ cīcā oce eykay. Jeymukorēm tak ōn. Owebe eymukorēm puje eyju dak eyġuycūġcūġ epe'e. ²¹ Waram eykay wajēm puje oġuycūġ cīcā oce eykay. Pūġ ġu ey'in cuk adi ikērēat o'ġuġē kuy bima. Warara'acat tayxi eju jepopo'uk osodop ip, warara'acat itop eju dak. Ibu'un pa'ore ma e'em ip ikērēat muġēġēap kuġ. Cepere ba'ore ma cebe ip. Imēn pit iġuycūġ'ūma e'em ip ikērēat muġēġēap kay. Ibu'u ġu o'e ip ikērēat muġēām. Imēnpuye oġuycūġ cīcā oce Deus etabutpe ikērēat kay acā eyju ġebum puye, ade em ma'ġu ōn eyawēwēm. Deus omuġebu ajo ġu ōn iap kay.

13

¹ Kuy xepxep em cuk adi eyjom ojeku. Waram ġuto ōn eyjo ojuy. Imēn e'em Deus ekawētup:

Pūġ pe warara'acat muwara buje wuyetabut ġu cekay, i. Xepxepayū be, ebapūġayū be dak imuwara buje bit, wuyetabut cuy ace'e cekay, i.

Imēnpuye koap cuy bit ōn jeymukorēm. Xepxepayū, ebapūġayū a'ījo'ūm pima bit, ōn jeymukorēm ġu. ² Xepxep em kuy ojeku eyjom. Waram wajēm puje wa'ōdim ġu ōn jeymukorēm—wa'ōpuruġ ma. Abu itabotaidabotbon je'e eykay? Ka'ūma ma. Kuy bima ade em cuk adi ocece eywebe imēn. Ġasū dak ġuto imēn ma oce. Imēn ma ōn e'em soat kuy bima ikērēat o'ġuġē'iyayū be. Soat pe dak ey'in imēn ma ōn e'em ikērēat muġēġē'ukayū be. ³ Eyetaybit epe'e ōn Cristo a'ōbi e'em

iam. Eyetaybit ġuġūn ġu epe'e iboam. Eyetaybit cīcā ma. Cristo ya'ōbaca'ūm ġu eykuġ—ya'ōbacam ma. Soat em ja'ōbacaap mubapukpuġ eywebe. ⁴ Korosa be je'ū buje ya'ōbaca'ūm osunuy. Ġasū bit itait ma'ġuto o'e. Deus ixē'ūm o'ġutait ja'ōbacaam soat podi ma ixē ya'ōbaca buye. Ipi daġ pima oceju dak ixē buxim oca'ōbaca ġu. Ceweju mūġ'i bima bit, ya'ōbacaap kuġ oceju e'em. Ey-buywat am tak ya'ōbacaap kuġ oceju.

⁵ Eyekukuap kay juy ġebum epesop Cristo ekawēn taġ paxi oceju jekukum iap kay.

— Wuyetabucap taġ paxi wuyju jekukum? — i juy epe'e'e eyewewebe.

Cristo a'ōbacaap kuġ tu eyju jekukum? Jewexe du eyju Cristo ebekitkiyū? Eyetabucap epere'ūm pima, eyetaybit cīcā Jesus Cristo wuywebe nuynuy iam. ⁶ Eyetaybit aco'i oacetabucap ocejepere ġu iam. Icēmān Cristo ekawēn taġ oceju jekukum.

⁷ — Bay, soat em cuy Corinto ka beayū buywatwan eġuy ixeyū be ikērēat muġēap puxim — i ōn e'em Deus pe. Imēn ōn e'em cebe warara'acayū be “Pauloyū cedaġ ma Corinto ka beayū o'ġutaybitbin” i'e'eap ojuy ġu—eywebe cedaġ ma jekukuap ojuy acā. “Pauloyū warēmtaġ ma Corinto ka beayū o'ġutaybitbin” i warara'acat e'em pima bit, ak'arit ma oce cekawēn kay. ⁸ Abu kuka kawēn icēmat tak o'ġu'ūm? Ka'ūma ma. Imu'ūm pa'ore. Iba'ore ġu bit ocewebe kawēn icēmat taġ oceku am. ⁹ Eyju eyetabut cīcā bima, ocecokcok oce'e oca'ōbaca ġu ma'ġu warara'acayū xe. Imēnpuye:

— Bay, a'ōbacaap cuy eġūm Corinto ka watwat pe ikērēat kay'ūmayūm je'e am — i oceju e'em Deus pe.

¹⁰ Wajēm awap eymukorēmaptup mubarararaġ ōn wajēm puje dak eymukorēmap puxim. Obu'u wa'ōpuruġ ey-mukorēm ām wuykukukat a'ōbi. Ixe juk ja'ōbacaap o'ġūm

owebe eymukorēm ãm ġu—eybuywat am acã. Owebe o'ġm eybuywat am biġ ma kūyjobit am jebiōġbuk a'ō kay am.

¹¹ Ibūrū ma buk, okitpitpiyū. Soat em cuy epesop ġebum ikērēat muġēap puxixim. Eya'ōpicūġcūġ wa'ō kay. Jewaġuycom cuy epesop eyeweweju. Kaba'um cuy epesop eyewekuġ. Deus ma wuymutaybitbin warara'acat kuġ xipan am. Ixe dak wuyaġuymubabibin soat em. Ixe juy soat em je'ku eyweju.

¹² Epeyewakobotbot cuy wuykukpin wuyeweweju iap mubapuk am soat pe.

— Kato'i juy cebe ip — i'e'em eywebe soat oxeayū itabucayū.

¹³⁻¹⁴ — Xipan cuy Corinto ka watwat ejukuk — i òn e'em wuykukukat Jesus Cristo be. — Eykukpin cuy ixeyū ejukuk — i òn e'em Deus pe. — Ixeyū burerem cuy eġuy soat em — i òn e'em Deus biōġbuk pe.

Ibūrū ma.

Deus ekawẽntup Kawẽn iisuat ekawẽn
New Testament in Mundurukú (BR:myu:Mundurukú)

copyright © 2010 Wycliffe Bible Translators, Inc.

Language: Mundurukú

Translation by: Wycliffe Bible Translators, Inc.

Mundurukú [myu], Brazil

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mundurukú

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

